

LIBRU OTTAVU

Turnu attacca l'accampamentu troju

Non sfuggi a Turnu ca lu campu troju
senza prisenza di lu capu fui
e pi cunsigghiu di la stissa Giunu
li truppi schiera ed all'assartu curri
di la marina ch'é tinuta in ansia
cu l'armi priparati all'evenienza.

Comu lu lupu cumpattannu va
lu brancu rattu c'all'assaltu curri
contru l'ovili di trimanti agneddi,
accussì Turnu supra lu cavaddu
appari e gridà di na parti all'autra
di l'attaccanti esercitu latinu.

Di colpu scorgi l'attraccati navi
e cu l'intentu di bruciarli pigghia
na fumicusa torcia e spingi tutti
a spargiri lu focu supra d'iddi,
ca daccussì sulu la morti ponu
spirari di truvari l'invasuri.

Ma nun pirmisi di Cibeli u Numi
c'abbrucinu li ligna di li navi,
ca foru fatti d'arvuli di pinu
di lu so boscu cunsacratu e vivu.
Idda cuncessi ca li navi in ninfi
trasfurmati nta l'acqui teverini
putissiru tummari e scumpariri.
La turba c'assaltava si firmavu
vidennu ddu purtentu veru stranu



*Idda cuncessi ca li navi in ninfi
trasfurmati nta l'acqui teverini ...*

pag. 120

e ca disappruvava dda truvata,
ma Turnu dissì ca lu divu Tebru
indicazioni dava d'impidiri
a li trujani di scappari ancora.

Scurri lu tempu 'ntantu e notti scinni
caliginusa e tetra e Turnu ferma
l'assaltu pi turnari a jornu novu
a fari stragi di l'udiati turchi,
ca cercanu d'intantu rinfurzari
lu muragghiuni ch'é di lignu fattu.

Li luci di bivaccu nta la notti
cumparunu nta l'unu e l'autru campu.

Eurialu e Nisu

Durmevanu tranquilli li latini,
sicuri ca dumani vincituri
lu celu li videva e pinsirusi
inveci allerta stavanu li troj,
ca circundati d'ogni latu sunu
e senz'Enea ca nenti sapi e poti.

Eurialu e Nisu giustu pinsamentu
d'avvisarlu ci vinni nta la menti,
attraversannu nottitempu l'orda
nimica addumisciuta, e ni parraru
a Julu, c'approuvavu la surtita.

Armati d'armi curti, li du amici,
e d'arcu e di turcassu cu li frecci,
ca chiù c'amici frati foru sempri,
comu sirpenti nta la notti funna
supra l'erba sciddicannu vannu
e nta na tenda trasunu silenti.

Ddocu li spadi, cu mastria maniannu,

nto sonnu fannu sicchi l'occupanti.

Ad un ad una chiù di deci sunu

li tendi visitati e chiù di trenta

li morti c'ammazzati ci lassaru.

Cuntenti e satisfatti surpassaru
l'accampamentu ca durmeva ancora,

ma d'impruvvisu avanti si truvaru

tricentu cavaleri ca Volcenti

a Turnu li pertava da Laurentu.

L'assicutaru a cerchiu nta lu pratu,
ma nta la magghia c'incappavu sulu

Eurialu, ca si ni scappavu Nisu.

Ma quannu chistu, ch'era salvu già,
d'appressu chiù non vitti lu cumpagnu,

arreri torna e l'arcu tendi contru

li cavaleri ca pressannu stannu

lu mischinu senz'armi nta li manu.

Unu n'ammazza, duì, forsi tri e quannu

Volcenti scorgi ca lu ferru azzicca

nta l'avvilutu amicu, cu la spada

s'allanza contru d'iddu e lu trafiggi.

Mori Volcenti e puru Eurialu mentri

di frecci trapunciutu Nisu cadi.

Amici e frati in vita e nta la morti,

Eurialu e Nisu foru cilibrati

esempiu vivu di fraternu amuri.

Li testi de du' troj in capu a picchi

aprisintati foru u jornu dopu

a li trujani chiusi nta lu campu,

mentri all'attaccu currunu li fanti.

Infuria la battaglia

Contru lu muru i Volsci fannu ressa
cu la tistugini muntata e scali
abbrancicati vidi e petri grossi
tummari da li mura, mentri Turnu
a na turri s'avventa di difisa
e la sdurruba e poi di spada ammazza
la teucra genti ca la difinneva.
Lu sutta capu rutulu Numanu,
cugnatu di lu regi Turnu appari
buriusu e tronfiu nta lu campu e dici:

Julu si fa onuri

- Orsù trujani a cummattiri adusi
sulu darreri a mura prutittivi,
di modda cunsistenza e finucchiastri,
nisciti fora in campu apertu armati
di lu curaggiu ca vi manca vili.
Anzicché fimmuni arrubari, fora
viniti ad assaggiari lu me ferru,
ca lu cumpensu dugnu a cu s'affudda! -
In lungu e largu gira e si furria,
ma giustu nta la frunti lu raggiungi
nu dardu ca d'Ascaniu fu lanciatu
e in terra stramazzavu cu fraguri.
Dopu, Buti cumpari accantu a Julu
e lu cunsigghia di ristari arrassu
di la battaglia, ca non po' muriri,
pirchè lu Fatu decretavu ad iddu
di non cascari mortu mentri pugna.
Fu nta stu puntu ca la porta apreru

*Pandaru e Bizia
Turnu imperversa*

Pandaru e Bizia, giganteschi frati,
e s'appustaru a l'anti cu li spadi
mazzziannu a morti l'accurrenti Volsci.
Li morti ammunziddati orrendamenti
sunu, ma Turnu arriva atroci e torvu
ca Bizia stenni cu nu corpu sulu.
Pandaru allura la porta chiudi a tappu,
ma nta la prescia fora lassa troj,
ca furunu ammazzati comu cani,
e dintra Turnu resta, ca cu la spada
la testa tagghia a Pandaru a mitati
e dopu comu nu turrenti in china
s'allanza contru li trujani e siddu
pinsatu avissi a grapiri la porta
di certu ddocu fini avia la storia
d'Enea troicu rumanu ca murtali
avissi statu la scunfitta licia.
Turnu non pensa! Ad ammazzari intentu
a centru si frapponi di lu campu
e pari na culonna ca non crolla
pirchè Giunoni lu pruteggi e duna
sempri chiù forza e viguria ad iddu.
Ma dall'Olimpu Giovi si n'adduna
ca Giunoni, la spada vurticannu
di lu furenti Turnu, stragi faci
immensa di Trujani e temi giustu
ca po' sfalliri lu distinu scrittu.
Na manu allonga nta lu Laziu e pigghia

Giunoni pe' capiddi e nta l'Olimpu
lestu la spingi. Turnu all'impruvvisu,
mentri Serestu e Ministeu cu raggia
l'affrontanu decisi a nun muddari,
li forzi perdi ed arretrannu curri
versu lu ciumi e suvirchiatu tumma
nta l'acqui e nata comu 'n-piscicani.

Si salva Turnu vincituri e vintu
ca senza mancu na firuta torna
nta lu so campu fuggitivu, dopu
ca na stragi facivu di nimici.